

Un sentée.

*Ma'l sunt truàa lì, incöö,
in du 'l stéss cantùun da tanti ànn fà,
quand cunt i mè amìis da fiöö,
in di bosch sa nàva a giügà.*

*Quanti regòrd dula giuventü,
ul sassùn, a dü pàss un pravétt,
la rungia l'è sücia, la gh'è pü,
gh'è restàa 'na strüsa da gerétt.*

*Oh! sentée, te sévat un tapée da munina,
umbregiàa cunt i ràmm a mò da capèll,
cunt ul cant di üsèj, 'mè 'n'urchestrina,
e nünch a pè biött a piruletà 'mè 'n magatèl.*

*Mò ul prugrèss l'è lì a dü pass,
ul smòg l'ha ingialdii i culùur dul pravétt,
ul sentée l'è pièen da rüdera e da sàss,
l'inciviltà du l'òmm l'ha fài un dispètt.*

*Ul pruverbi al düs: chi vivarà, vedarà.
Ma l'interèss al vöör mia sentì resùn,
la rungia, ul pravétt, hinn robb da censürà,
hinn assée düü vaas da geràni sül balcùn...*

Carletto BOSSI